



partii naleraq

Nuuk, 23. marts 2015

Anthon Frederiksen

**UPA 2015/57**

**Meeqqanut suli atualersimangitsunut naleqquttumik Kullorsuarmi perorsaanikkut ineriartornissamut neqerooruteqalersinnaanermut tunngatillugu sanaartornikkut pisariaqartitsinerup misissuiffigineqarnissaanik Naalakkersuisut peqquneqarnissaat pillugu Inatsisartut aalajangiiffigisassáattut siunnersuut. Misissuinermit ilaliullugu kommunimut pineqartumut inassuteqaatinik suliaqartoqartariaqarpoq, nammineq killiliussat iluanni pisariaqartitsinerup tamatuma nammassiniarneqarsinnaanera pillugu.**

(Inatsisartunut Ilaasortaq Hans Enoksen, Partii Naleraq)

### **Siullermeerneqarnera**

Inatsisartunut Ilaasortap Hans Enoksenip Partii Naleqqamiit siunnersuutaa Partii Naleqqamiit imannak oqaaseqarfigissuarput.

Qujanarpoq Partii Naleqqamiit Inatsisartunut Ilaasortap Hans Enoksenip Kullorsuarmi meeqqanut suli atualersimangitsunut naleqquttumik perorsaanikkut ineriartornissamut neqerooruteqarsinnaaneq pillugu sanaartornikkut pisariaqartitsinerup misissuiffigineqarnissaa pillugu inatsisartunut aaliangiiffigisassatut siunnersuuteqarmat.

Tassami nalunngilarput nunaqarfippassuarni meeqperiveqarnikkut minnerunngitsumik meeqqanut atuareernerup kingorna ornitassaqarnikkut allarpassuartigullu meeqqanut inuusuttuaqqanullu pitsaasumik ineriartortitsinissaq anguniarlugu naalagaaffiit peqatigiit meeqqat inuusuttullu pillugit aalajangersagaasa aamma nunatsinniit akuerineqarsimasut pillugit pisussaaffinnut naapertuuttumik suliniuteqarnissat eqqarsaatigalugit.

Manna iluatsillugu Partii Naleqqamiit meeqqanik inuusuttunillu sullissisut Meeqqat Inuusuttullu Oqaloqatiginnittarfiani aamma Meeqqat Inuunerissuni suleqataasut il.il., minnerunngitsumik aamma inuppasuit akissaq eqqarsaatiginnikkaluarlugu peqatigiiffinni, timersoqatigiiffinni allatulluunniit meeqqat inuusuttullu inuunerissaarnissaat pillugu suleqataasut tamaasa qutsavigaagut.

Ukiuni kingullerni qujanartumik nalunaarusiat paasissutissallu arlallit Namminersorlutik Oqartussanit pigineqarput, tamakkulu ilarpassui Meeqqat Inuusuttullu Oqaloqatiginnittarfiata sulilluarneratigut katersorneqarsimapput.

Tassa paasissutissat naapertorlugit 2014-imi meeqqat suli atualinngitsut katillugit 4.843-put, taakkunanga 0-2-nik ukiullit 2.358-iupput, pingasuniillu tallimanut ukiullit 2.485-iupput. Taakkunanga 3.487-it pisortat ingerlataanni ulluinnarni meeqperivinniittarput procent-inngorlugu

72 %-ii, tassa 2014-imi. Taamaalillugu takusinnaavarput meeqqat suli atualingitsut 1.356-it meeqquvinninnissaminut periarfissaqarsimangitsut.

Paasissutissat aamma takutippaat meeqqat 0-2-nik ukiullit nunaqarfinni najugaqartut taammaallaat 31 %-ii meeqquvinniittartut, pingasuniillu tallimanut ukiullit taamaallaat 53 %-ii nunaqarfinni meeqquvinniittartut.

Nalunaarsukkat aamma takutippaat meeqqanik paaqqinnittarfiit katillugit 75-it illoqarfinniittut, taamaallaallu 47-t nunaqarfinniillutik.

Taamaammat paasissutissat qulaani taaneqartut uppersisereerpaat nunaqarfinni meeqqariveqarnikkut annertuumik kinguussaasoqarsimasoq.

Partii Naleqqamiit isumaqarpugut annerusumik misissueqqinnernut aningaasartuuteqaqqinngikkaluarluta kommunit suleqatigalugit nunaqarfiit meeqqariveqanngitsut soorlu Kullorsuaq allallu pisariaqartitsineq naapertorlugu tulleriarlugit kommunit peqatigeqqissaarlugit meeqqarivinnik pilersitsiffiginissaat pimoorunnerusariaqartoq.

Tassami inatsisartut inatsisaat nr. 16, 3. December 2012-imeersup § 1-imi imannak allaqqasoqarpoq:

*“ Inatsisartut inatsisaata matuma meeraq qitiutillugu, meeqqamullu angajoqqaatut oqartussaasut imaluunniit meeqqamik pilersuisuusut, meeqqanut ataasiakkaanut suli atualingitsunut pitsaanerpaamik ikorfartuinissaq qularnaassavaa, tassuunakkut meeqqap peqqissumik imaqarluartumillu inerikkiartornissaa qularnaarumallugu.”*

Aamma § 4, imm. 2, nr. 2 imannak oqaasertalik:

*“Naalackersuisut makku isumagissavaat:*

*2) Meeqqanut ulluunerani neqeroorutit nutaamik ilusillit inerisarnissaat, taakkununga ilaallutik nunaqarfinni pissutsinut naleqqussagaasumik allaanerusumik meeqqanut ulluunerani neqerooruteqartarnej.*”

Taamaattumik Partii Naleqqamiit Naalackersuisut akissuteqarnermini siunnersuummut ilaliinerat qujassutigaarput.

Taama Partii Naleqqamiit oqaaseqarluta suliap aappassaanernejannginnerani ataatsimiititaliami susassaartumi suliarineqarnissaa inassutigaarput.